

豫章叢書

第五冊

寒

平

策

畫

第 一 冊

第 一 冊

廬山紀事卷五

廣陵 桑喬 子木

山南自七尖山東北行至含鄱口

棲賢谷

七尖山東北有大谷是爲棲賢谷

山疏棲賢谷值含鄱口南三峽澗出焉廬山之谷以三數棲賢谷爲大又多奇勝人尤樂遊之云

含鄱口

棲賢谷其最北山巔爲含鄱口

山疏含鄱口在含鄱嶺東南乃天池之南道口向

鄱湖而峻勢若可吞鄱湖故云

水經注 嶺南有大道順山而下有若畫焉傳云匡
先生所開通江道巖上有宮殿故基三以次而上
最上極於山峰

山疏 含鄱口南曰砦口其下曰能邪有石曰大石
斗笠石

砦口東南有白龍潭水自山巔下注潭中俗謂之
白水漕

白石菴

含鄱口西有寶陀羅漢二岩其水曰野人源有僧舍

曰楞伽院

山疏楞伽有上下二院在能邪西今廢張孝祥有

詩

院內有白石菴

山疏白石菴者宋李常公擇讀書處也公擇建昌人少與兄弟讀書菴中已而皆及第公擇以文學政事名當時蘇東坡嘗與之唱和黃山谷者其甥也元祐更化以常爲三司使或言常少幹略司馬光曰使天下知吾意不忿於利

公擇在朝時以詩寄菴僧端老云煩師爲掃山中

石待請歸時欲醉眠然竟不克歸菴亦旋廢其後
西蜀人李復亦嘗居之而易其名曰白雲菴復死
亦廢其後勝國時豫章有熊處士者亦卽其趾築
室居焉憲幕官范祥寄詩云尙書舊隱在匡廬傳
道新來事已墟祠宇又令誰薦菊鬼神猶爲護藏
書石泉宛宛通池細川樹冥冥映日踈爲問豫章
熊處士幽栖消息近何如後亦廢

公擇旣貴乃藏書九千卷於菴中以俟觀者蘇東
坡詩
象犀珠玉珍怪之物有悅於
人之耳目而不適於用桑麻布帛五穀之材有適

於用而用之則弊取之則竭悅人之耳目而適於
用用之而不弊取之而不竭賢不肖之所得各隨
其本仁智之所見各當其分本分不同而求無不
獲者惟書乎孔子聖人其學必始於觀書當是時
惟周之柱下史聃爲多書韓宣子適魯然後見易
象與魯春秋季札聘於上國然後得聞詩之雅頌
而楚獨有左史倚相能讀三墳五典八索九丘士
之生於是時得見六經者蓋無幾其學可謂難矣
而皆習於禮樂深於道德非後世君子所及自秦
漢以來作者益衆紙與字畫日趨於簡便而書益

多世莫不然學者益以苟簡何哉余猶及見老儒
先生自言其少時欲求史記漢書而不可得幸而
得之皆手自書寫日夜讀誦若不及近歲士人摹
刻諸子百家之書日傳萬紙學者於書多且易致
如此其文辭術業當倍蓰於昔人而後生科舉之
士皆束書不觀遊談無根此何也余友李公擇少
時讀書於廬山五老峰下白石菴之精舍公擇旣
去山中之人思之指其所居爲李氏山房藏書九
千餘卷公擇旣涉其流探其源剝其華實而咀嚼
其膏腴以爲已有發於文章見於行事以聞名於

當世矣而書固自如也未嘗少損將以遺來者供
其無窮之求而各足其人本分之所當得是以不
藏於家而藏於其故居之僧舍此仁者之用心也
余既衰且病無所用於世惟得數年之閑以盡讀
其所未見之書而廬山固所願遊而不可得蓋將
老焉盡發公擇之藏而拾其餘棄以自補庶有益
乎而公擇求余文以爲記乃爲之言使來者知昔
之君子見書之難而今之學者有書而不讀爲可
惜也熙甯九年九月朔記

蘇東坡志林李公擇喜墨見人有佳墨卽攘取之

他日客有自公擇所來者爲言公擇懸墨滿堂此亦通人之一蔽也

山麓菴舊有三賢祠以祀李公擇李公南蘇東坡今廢公南者公擇之弟李布也博學有俊才與公擇齊名時號二李東坡詩何人脩水上種此一雙玉蓋指此也布早卒公擇兄莘亦讀書菴中博學能文章然名不逮二李仕至轉運使

楞伽院鐘樓舊有崇德縣君所畫二墨竹今不存崇德縣君者公擇之女黃山谷之姨母也善繪事黃山谷嘗爲作崇德縣君墨竹詩

太乙峰犁頭尖山桃林山萬壽寺

含鄱口西南爲太乙峰其下有老鷹崖

舊志太乙峰在廣壽院前廣壽院在行龜峰下

山疏廣壽院在萬壽寺東廣水坂內峰在寺基北
峭削與衆峰殊故名太乙山南人謂之大型頭尖
德勝龍潭在峰西南

太乙峰水東南行逕萬壽寺與衆水會

太乙峰南爲犁頭尖山

山疏山南人謂之小型頭尖

太乙峰西南爲桃林山山西南與漢陽峰接

山疏老鴉口在桃林太乙之間長壠在桃林漢陽之間

桃林澗水東北行逕萬壽寺與眾水會

犁頭尖山之南有萬壽寺

山疏萬壽寺唐僧惠英建後兵燬我明正統年間僧明菴重建

寺北有百花園今廢寺南有水曰萬壽源

雨岩黎僊峰廬山寺

萬壽寺西南有山巍然高者漢陽峰也其上有雨岩

舊志雨岩在漢陽峰南踟而深晝日嘗黯黯天將

雨嘗有雲氣出其中故取傅岩之義名焉

黎僊峰

新志 黎僊祠在廬山絕頂女真黎氏所棲隱處也
黎既僊去人因祠祀之其後禱雨輒應復繪像祀
之祠今廢

山陰 漢陽坡上有廢塚蓋二氏居此山者所葬處
也世謬傳以爲漢王塚又言其疑塚三十六甯藩
之亂南康人有欲盜伐之者以莫知孰爲真塚而
止

廬山寺

山疏廬山寺在漢陽坡上今廢

高僧傳晉僧曇翼宋僧慧慶道慧並嘗住廬山寺

唐劉沓廬山寺詩孤峰臨萬象秋氣何高清庭

際南郡出林端西江明山門二緇叟振錫聞幽聲
心照有無界業懸前後生徒知真機靜尙與愛網
并方首金門路未遑參道情

楊衡廬山寺詩千峰白露後雲壁掛殘燈曙色海
邊日經聲松下僧意閒門不閉年去水空澄稽首
如何問森羅盡一乘

鄭常送頭陀赴廬山寺詩僧家無住著早晚出東

林得道非真相頭陀是苦心持齋山果熟倚錫野
雲深溪寺誰相待香花與梵音

進士馬戴廬山寺詩白茅爲屋宇編荆數處堦堦
石疊成東谷笑言西谷響下房雲雨上房晴鼠驚
樵客緣蒼壁猿戲山缺撼紫煙別有一條投澗水
竹筒斜引入茶鑪

三峽澗

棲賢谷之水其會爲三峽澗澗在萬壽寺東南

山疏萬壽寺東南行龜峰之末衆水之所會也凡
能邪迤東團山黃石諸水能邪迤西桃林長壠諸

水小大支流九十有九皆入於三峽澗澗有洗馬池

蘇子由棲賢寺記棲賢谷中多大石岌業相向水行石間聲如雷霆如千乘車行者震掉不自持雖三峽之險不過也蘇東坡志林讀子由記便如在堂中見水石陰森竹樹膠輻僕當爲書之刻石堂上亦欲與廬山結緣他日入山不爲生客也

瘦馬嶺烏石崖山石佛山石佛寺紅石崖山

漢陽之徼東北行曰瘦馬嶺

山疏瘦馬嶺在萬壽寺西山巉削骨立如裂其上

有烏龜石

瘦馬嶺東爲烏石崖山

山疏雙澗口在烏石崖東水岐而二其一出七尖

山廢寶慶寺其一逕石佛寺而南

烏石崖東爲石佛山其下有石佛寺

山疏山有三峰並峙如佛

南康志青蓮菴卽石佛寺宋僧杜林建後兵燬宣
德中僧普營重建

煎魚澗在寺東南雙澗口水也滴水崖在寺東然
不常滴